

# Náittoslihttui vihaheapme

Náittoslihttui vihaheame sáhttá doaimmahit dan manjá, go náittosbárra lea ožžon duodaštusa náittoslihtu eastagiid dutkamis.

Soai, geat áiguba girkus vihahuvvot, galgaba leat rihppaskuvlla vázzán girku lahtut. Juos nubbi guoimmis ii leat girku lahttu, soai sáhttiba vihahuvvot girkus, juos girkui gullameahttun guoibmi gullá mannu eará kristtalaš girkui dahje oskkoldatovttastupmái (GO 2: 18). Náitalit áigu dahje juo vihahuvvon báraid namat almmuhuvvojit searvegotti oktasaš ipmilbálvalusas, juos sii eai leat dan gieldán. Sin ovddas rohkadallo ipmilbálvalusa oktasaš ovddasrohkosis.

Vihaheame doaimmaha báhppa. Son galgá ságastit moarsiin ja irggiin das, mii náittoslihttu lea ja maid lpmila buressivdnideame bivdin dasa mearkkaša.

Musihka válljemis galgá váldit vuhtii doaimmahusa ipmilbálvaluslágan luonddu. Doaimmahusas galggašii leat aŋkke okta sálbma. Musihkas vástida kántor, ja das galgá ságastit suinna.

Vihaheapme doaimmahuvvo girkus, ruovttus dahje eará sajis dađe mielde go báhppa ja náittosbárra das sohpet (GO 2: 19).

Vihaheames galget leat mielde uhcimustá guokte duodašteaddji. Vihaheames moarsi čuožžu irggi gurot bealde.

## I Álggahus

---

### \*1. Álggahanmusihkka

---

Álggahanmusihkkan sáhttá leat čuojanasmusihkka ja/dahje sálbma.

### 2. Álgosivdnideapme

---

Buressivdnádusa ja vuorodearvvahusa lea vejolaš lohkat dahje lávlut.

#### Buressivdnádus

**B** Áhči ja + Bártni ja Bassi Vuoiŋŋa nammii.

**S** Ámen.

#### Vuorodearvvahus

**B** Hearrá lehkos dinguin.

**S** Nu son lehkos maddái du vuoiŋŋain.

### 3. Álggahansánit

---

Báhppa ráhkada álggahansániid ieš dahje geavaha čuovvovaš molssaeavttuid.

**B** Buorre náittosbárra, NN ja NN (ovdanamat). Doai leahppi bohtán náitalit Ipmila muođuid ovdii. Su sáni guldalemiin ja ovttas rohka-dallamiin mii bivdit dudnuide ja dudno náittoslihttui Ipmila buressivdnádusa. Biibbalis celkojuvvo: ”Ipmil sivdnidii olbmo govvanis, Ipmila govvan son su sivdnidii, olmmájin ja nisun son sivdnidii sudno. Ipmil buressivdnidii sudno”. (1 Mos 1: 27–28)

#### DAHJE

**B** Ráhkis ustibat. Mii leat dál Ipmila ovddas bivdimin NN:i ja NN:i (ovdanamat) su buressivdnádusa. Jesus cealká: ”Sivdnideame álggus Ipmil sivdnidii sudno olmmájin ja nisun. Dan dihtii olmmái guoddá áhčis ja eatnis, ja bissu áhkás luhtte, ja dat guovttis šaddaba oktan oažžin. De eaba leat šat guovttis, muhto okta. Maid Ipmil nappo lea ovttastahtán, dan ii olmmoš galgga earuhit”. (Mark 10: 6–9)

#### DAHJE

**B** Ráhkis ustibat, NN ja NN (ovdanamat). Biibbalis celkojuvvo, ahte Ipmil sivdnidii olbmo olmmájin ja nisun ja oaivvildii sudno goabbat guoim-miska guoibmin. Ipmila sáni guldalemiin ja ovttas rohkadallamiin mii bivdit dudno náittoslihttui su buressivdnádusa.

### 4. Biibbalsálbma

---

Sáhtá atnit maddái girkojagi čuovvu dahje eará biibbalsálmmaid.

Biibbalsálmma sáhtá lohkat dahje lávlut. Dan álggus ja loahpas sáhtá leat antifona.

Biibbalsálbmii laktojuvvo Uhca gudni. Dan sajis sáhtá atnit čuovvovaš sálmmaid vearssaid: 5:4, 66:3, 136:7, 218:7, 336:8, 340:8, 341:10, 348:6, 379:6. Uhca gudni guđđojuvvo eret 5. fástoáiggi sotnabeaivvi rájes.

#### Antifona

Herrá lea midjiide sakka árbmugas,  
su oskkáldasvuohta bistá agálaš áigái.

Sál 117: 2

## DAHJE

Herrá lea mu báhtaranbáiki ja ladni,  
mu Ipmil geasa dorvvastan.

Sál 91: 2

## Biibbalsálbma

Dat guhte čohkká Alimusa suojis  
ja ássá Buotveagalačča suoivanis, dadjá ná:

”Herrá lea mu báhtaranbáiki ja ladni,  
mu Ipmil geasa dorvvastan.”

Soadjádolggiidisguin son gokčá du,  
su soajáid vuolde don gávnnat suoji.

Su oskkáldasvuohta lea galba ja suodjalus.

Du báhtaranbáiki lea Herrá,  
don leat dahkan Alimusa orrunsadjinat.

Sál 91: 1–2, 4, 9

## DAHJE

Mun bajidan čalmmiidan váriid guvlui:

Gos bohtá munnje veahkki?

Mu veahkki bohtá Herrás,  
almmi ja eatnama sivdnideaddjis.

Ii son divtte du juolggi suoibut,  
du goziheaddji ii oadestuva.

Ii son oadestuva iige nohka,  
son lea Israela goziheaddji.

Herrá lea du goziheaddji,

Herrá lea du suoivvan du olgeš gieda bealde.

Beaivváš ii vahágahte du beaivet  
iige mánnu ihkku.

Herrá várjala du buot bahás,  
son várjala du heakka.

Hearrá várjala du vuolgima ja du boahtima  
dálážis gitta agálaš áigái.

Sál 121

## DAHJE

Hearrá sátni lea álo luohtehahti,  
son lea oskkáldas buot daguinis.

Vuorddašemiin buohkat gehččet dutnje,  
ja don attát sidjiide borramuša rivttes áigái.

Don rabat giedat

ja gallehat buot heakkalaččaid buorrevuodastat.

Vanhurskkis lea Hearrá buot vadjolusastis  
ja oskkáldas buot daguinis.

Hearrá lea buohkaid lahka gudet čurvot su,  
gudet čurvot su duohtavuodas.

Son ollašuhttá ipmilbalolaččaid sávaldagaid,  
son gullá sin čuorvasa ja beastá sin.

Sál 145: 13, 15–19

All 8: 6–7

## Uhca gudni

Gudni Áhččái ja Bárdnái

ja Bassi Vuignii,

nugo lei álggus, dál lea ja álo

agálašvuodas agálašvuhtii. Ámen.

## Antifona gearduhuvvo.

## 5. Rohkos

---

Sáhtta geavahit maiddái moarsemeassu minstara rohkosiid (čuokkis 8).

Rohkosávžžuhusa ja searvegotti ámena lea vejolaš lohkat dahje lávlut. Ávžžuhusa manjá sáhtta leat oanehis jaskes rohkos.

**B** Rohkadallot.

1. Ipmil, almmálaš Áhčči.

Don sivdnidit olbmo olmmájin ja nisun  
ja addet sudnuide náittoslihtu attáldahkan ja fidnun.  
Buessivdnit NN ja NN, guđet odne náitaleaba.  
Giitu, ahte diktet sudno gávdnat goabbat guoimmiska.  
Buessivdnit dán ávvubottu, maid mii dál ávvudit.  
Divtte Kristusa orrut min guossin.  
Dán mii rohkadallat su namas.

2. Kristus, don ráhkisvuoda gáldu.

Don basuhit oktii Kana hejaid, go ledjet doppe guossin.  
Boade maiddái dáid hejaide guossin,  
go NN ja NN náitaleaba.  
Láide min buohkaid oktii stuorra hejaide almmis.  
Gula min buorrevuodat dihtii.

3. Ipmil, máilmmi sivdnideaddji.

Don attát náittoslihtus olbmá ja nissona  
guoibmin goabbat guoibmáseaskka.  
Mii giitit du das,  
ahte maiddái náittoslihttu speadjalastá  
du sivdnidanbarggu buorrevuoda ja čábbodaga.  
Atte buressivdnádušat NN ja NN lihttui,  
vai soai sáhtášeigga das ollašuhhtit du addin barggu  
ja váldit giitevažžan vuostái eallima attáldagaid.  
Gula min don, guhte leat buot buorrevuoda gáldu.

4. Almmálaš Áhčči.

Ráhkisvuodastat don leat ásahan náittoslihtu  
ja gohččon guimmiid callit sánát mielde.  
Veahket sudno ráhkistit goabbat guoimmiska,  
nu mo Kristus ráhkistii searvegottis.  
Veahket guimmiid atnit náittoslihtuska bassin  
ja čuovvut eallimisttiska du dáhtu.  
Atte sudnuide návccaid bissut oskkáldassan goabbat guoibmáseaskka.

Gula min Bártnat Jesusa Kristusa,  
Hearrámet dihtii.

**S** Ámen.

## II Sáni

---

### 6. Biibbalohkan

---

Lohkkojuvvo okta dahje moadde čuovvovaš čálabihtáin. Sáhtta atnit maiddá girkojagi čuovvu dahje eará čálabihtáid.

Lohkki almmuha čálasaji.

Biibbalohkamii lea vejolaš laktit vástádusa (biibbalsálbma, sálbma, lávlla, čuojanas-musihkka dahje jaskes mediteren).

1 Mos 1: 27–28

Ipmil sivdnidii olbmo iežas govvan, Ipmila govvan son sivdnidii su, olmmajin ja nissonin son sivdnidii sudno. Ipmil buressivdnidii sudno ja celkkii suduide: ”Leahkki šattolaččat ja lassaneahkki, deavdi eatnama ja dahkki dan iežade vuolibužžan. Ráddejeahkki meara guliid ja almmi lottiid ja buot elliid mat lihkadit eatnama alde.”

1 Kor 13: 1, 4–8, 13

Vaikko vel sártnošinge olbmuid dahje engeliid gielaiguin, muhto mus ii livčče ráhkisvuohta, de livččen dušše čuoddji biellu dahje skilaid deaddji divga.

Vaikko mus vel livččiige profehtastallanattáldat ja dovddašin buot čie-gusvuodaid ja buot diedu, ja vaikko mus livččii buot osku nu ahte sáhtášin váriid sirdit, muhto ii livčče ráhkisvuohta, de mun in livčče mihkkege. Vaikko vel juogadivččen váivvážiidda buot mii mus leažžá, ja vaikko divttášin iežan boldojuvvot, muhto mus ii livčče ráhkisvuohta, de dat ii livčče munnje ávkin.

Ráhkisvuohta lea gierdavaš, ráhkisvuohta lea ládis, ii dat gádaš iige rábmo iige čeavlástala. Ii dat daga maidege dohkkemeahttumiid iige

bivdde iežas ávkki, ii dat suhta iige vurke baháid. Ii dat illut vearri-  
vuodas, muhto baicca duohtavuodas. Dat gillá buot, osku buot, doaivu  
buot, gierdá buot. Ráhkisvuohta ii noga goassege.

De dat bissot, dát golmmas: Osku, doaivu ja ráhkisvuohta. Muhto buot  
stuorimus dain lea ráhkisvuohta.

Ef 4: 32–5: 2

Lehket buorit guhtet guimmiidasadet; lehket váibmoláddásat ja addet  
ándagassii guhtet guimmiidasadet nugo Ipmilge lea addán didjiide  
ándagassii Kristusis.

Atnet nappo Ipmila ovdagovvan, dii geat lehpet su ráhkis mánát.  
Vádjolehket ráhkisvuodas, nugo Kristusge lea ráhkistan min ja addán  
iežas min dihtii attáldahkan, njuovvanoaffarin mii lea Ipmila miela  
mielde.

Fil 4: 4–7

Illudehket álelassii Hearrás! Vel oktii cealkkán: Illudehket! Dovdoset  
buot olbmot ahte dii lehpet láddásat. Hearrá lea lahka! Allet ane  
morraša mastege! Buktet baicca buot dárbbuideattet ovdan Ipmilii  
rohkadallamiin ja ánodemiin giitevašvuodain! De Ipmila ráfi, mii  
manná buot jierpmi badjel, várjala din váimmuid ja jurdagiid Kristus  
Jesusis.

Kol 3: 12–14

Go dii lehpet Ipmila välljejuvvon, bassi ja ráhkistuvvon olbmot, de  
gárvodehket dan dihtii njuoras árkkálmastinvuodain, buorrevuodain,  
ustitlašvuodain, vuollegašvuodain ja gierdavašvuodain, nu ahte dii  
gierdabehtet guhtet guimmiideattet ja addibehtet ándagassii guhtet  
guoibmáseattet, juos nuppis leš váidámuš nuppi vuostái. Nugo Hearrá  
lea addán ándagassii didjiide, nu galgabehtet diige addit ándagassii  
guhtet guoibmáseattet. Muhto ovddimustá, gárvodehket ráhkisvuodain  
mii lea ollisvuoda báddi.

Nu lea Ipmila ráhkisvuohta almmustuvvan min gaskii ahte son vuolggahii áidnoriegádan Bártnis máilbmái vai mii ealášcimmet su bokte. Ráhkásiiddán, juos Ipmil lea ráhkistan min nu, de miige leat geatnegasat ráhkistit guhtet guimmiideamet. Ii oktage leat goassege oaidnán Ipmila, muhto juos mii ráhkistit guhtet guimmiideamet, de Ipmil bissu min siste, ja su ráhkisvuohta ollašuvvá min siste.

Matt 19: 4–6

Jesus cealká:

”Ehpetgo leat lohkan ahte Sivdnideaddji álggus sivdnidii sudno olmmájin ja nisun ja celkkii: Dan dihtii olmmái guoddá áhčis ja eatnis ja bissu áhkás luhtte, ja dat guovttis šaddaba oktan oažžin. De eaba leat šat guovttis, muhto okta. Maid Ipmil nappo lea ovttastahtán, dan ii olmmoš galgga earuhit.”

Joh 2: 1–11

Goalmmát beaivvi ledje náittosheajat Kanas Galileas. Jesusa eadni lei doppe, ja maiddái Jesus máhttájeddjiidiguin lei bovdejuvvon heajaide. De nohkkogohte viinnis, ja Jesusa eadni dajai sutnje: “Sis ii leat šat viidni.” Jesus celkkii: ”Nisu, maid don áiggut muinna? Ii mu diibmu leat velá boahtán.” Muhto su eadni dajai bálvaleddjiide: ”Dahket buot maid son gohčču.”

Das ledje geadgečáhcelihtit, nugo vierru leige juvddálaččaid buhtistanmearrádusaid mielde. Ledje guhtta lihti, mat gesse guokte dahje golbma ánkara guhtege. Jesus celkkii: ”Devdet lihtiid čáziin.” Ja bálvaleddjít devde daid ravddaid dási. Son celkkii sidjiide: ”Goivot das ja guddet heajaid ovddasčužžui.” Sii gudde dan heajaid ovddasčužžui, ja son máisttii čázi mii lei šaddan viidnin. Ii son diehtán gos dat leažžá boahtán, muhto bálvaleddjít geat ledje goivon čázi, sii gal dihte. De son gohčui irggi boahit ja dajai: ”Earát guossohit vuos buori viinni, ja go guossit juhkaluvvagohtet, de buktet fuonibu. Muhto don leat seastán buori viinni dássáži.”



Dán vuosttaš mearkadagus Jesus dagai Kanas Galileas. Son almmustahtii hearvásvuodas, ja su máhttájeaddjit osko sutnje.

Joh 15: 9–12

Jesus cealká:

”Nugo Áhčči lea ráhkistan mu, nu lean munge ráhkistan din. Bissot mu ráhkisvuodas! Juos doallabehtet mu báhkkomiid, de bissubehtet mu ráhkisvuodas, nugo munge lean doallan Áhččán báhkkomiid ja bisun su ráhkisvuodas.

Dán lean sárdnon didjiide, vai mu illu bisošii din siste, ja din illu šattašii ollisin. Dát lea mu báhkkon: Ráhkistehket guhtet guimmideattet nugo mun lean ráhkistan din.”

## 7. Sárdni

---

Báhppa doallá friddja sárdni dahje geavaha goappánu čuovvovaš molssaeavttuin. Sárdnis sáhtá váldit ovdan čuovvovaš fáttáid:

- náittoslihttu Ipmila attáldahkan ja ortnegin
- náittoslihttu beallalaččaid ahtanuššama báikin
- bearaš servodaga vuodđun
- illu ja giitevašvuohta
- ráhkisvuohta ja oskkáldasvuohta
- dovdu ja dáhttu
- ándagassiiátnun ja -addin
- fulkkiid ja ustibiid doarjja

Buorre náittosbárra, NN ja NN (ovdanamat), buorit searvegotti olbmot / buorit headjaguossit. Ipmil ieš lea ásahan náittoslihtu juo máilmmi sivdnidettiin. Hearrámet Jesus Kristus lea deattuhan dan mearkkašumi cealkkedettiin: ”Maid Ipmil lea ovttahtán, dan ii olmmoš galgga earuhit.” Adni dan dihtii fuola lihtusteatte. Go ná dahkabeahhti, dat sáhtá buktit dudno eallimii lihku ja buressivdnádusa. Leahkki vuollegaččat ja gudnejahtti goabbat guoimmáde, vai dudno gaskasaš oktavuohta bisošii náittoslihtus.

Dikti Kristusa boahit dudno ruktui. Lehkos Ipmila sárdni čuovggasin dudno oktasaš bálgá alde. Dalle su Vuoigŋa sáhtá váikkohit váimmus-

teatte, nu ahte dudno ráhkisvuohta nanosmuvva ja čiekŋu. Muiti rohkosa vejolašvuoda. Rámideahkki buriid beivviid Ipmila buorrevuoda ja dorvasteahkki bahás beivviid su veahkkái.

Apoasttal ávžžuha kristtalaččaid guoddit guhtet guoimmiset nodiid. Juoga-deahkki nappo iluid ja morrašiid, maid doai eallimis vásiheahppi, ádnu ándagassii ja leahkki gárvásat maid addit ándagassii goabbat guoibmáseatte. Bálvaleahkki goabbat guoimmáde daid attáldagaiguin, maid doai leahppi Ipmilis ožžon. Oskkáldasvuohta, ráhkisvuohta ja osku Ipmilii dahket dudno lihttui nana vuodu. Dalle doai oažžubeahtti vásihit dan buressivdnádusa, man Ipmil lea náittosguimmiide lohpidan.

[Fuolkkit ja ustibat! Dii lehpet dál illudeamen NN:in ja NN:in (ovdanamat) ja miedušteamen sudno mátkái lihkusávaldagaiguin ja buressivdnádu-saiguin. Dorjot sudno maidái eallima árgan. Muiet sudno rohkosiinnádet. ]

## **DAHJE**

Ráhkis ustibat. NN ja NN (ovdanamat). Odne lea dudno eallima stuorra ávvubeaivi. Ipmil lea diktán dudno gávdnat goabbat guoimmáde. Dál doai čatnaseahppi eallit ovtas ja ráhkistit ja gudnejahttit goabbat guoimmáde. Mii illudit dudnuin ja rohkadallat dudno lihttui Ipmila buressivdnádusa.

Ráhkisvuohta lea dovdduin buot fámolamos. Muhto dat ii leat almmatge dušše dovdu. Duohta ráhkisvuohta gohčču dudno atnit fuola goabbat guoimmisteatte árgaeallimis. Ráhkisvuohta sáhtá lassánit, dan buorin sáhtá doaibmat ja dan galgá dikšut.

Ipmil lea ráhkisvuoda gáldu. Son lea ásahan náittoslihtu sivdnidettiin olbmo olmmájin ja nisun. Aiddofal dan lihtus ollašuvvet illu ja lihkku buoremus lági mielde. Velá ainge son diktá min vásihit buorrevuoda ja ráhkisvuoda. Buoremusge náittoslihtus bohtet ovdan váttisvuodat. Olbmuid gaskasaš váttisvuodaid galgá geahččalit čoavdit. Sagastalli maidái váttis áššiin ja guldaleahkki goabbat guoimmáde. Jesus ieš dohkkehii ustibinis čádjidan ja váilevaš olbmuid. Ná son attii midjiide ovdagova. Ándagassii átnun ja ándagassii addin lea Ipmila attáldat.

[Ruovttu]searvegoddi addá dudnuide dán ávvubeaivve Biibbala. Doppe leat valjis bagadeamet ja rávvagat oktasaš eallima várás. Muhto buot buoremus Biibbalis leat almmatge Ipmila lohpadusat. Son lea lohpidan orrut omiidisguin maddái árgabeai eallimis.

### III Vihaheapme

---

Searvegoddi sáhtá čuožžut čuoggáid 8–11 buohta.

#### 8. Gažaldagat

---

Báhppa jearrá irggis:

Ipmila muoduid ovddas ja dán searvegotti (dáid duodašteaddjiid) ovddas mun jearan dus, NN (oppa namma), dáhtutgo don váldit NN (oppa namma) náittosguoibminat ja leat sutnje oskkáldas ja ráhkistit su buorre ja bahás beivviid, gitta jápmima rádjai?

Vástáduš:

De dáhtun.

Báhppa jearrá moarsis:

Ipmila muoduid ovddas ja dán searvegotti (dáid duodašteaddjiid) ovddas mun jearan dus, NN (oppa namma), dáhtutgo don váldit NN (oppa namma) náittosguoibminat ja leat sutnje oskkáldas ja ráhkistit su buorre ja bahás beivviid, gitta jápmima rádjai?

Vástáduš:

De dáhtun.

#### **DAHJE**

Báhppa jearrá irggis:

Buotdiehti Ipmila muoduid ovddas ja dán searvegotti (dáid duodašteaddjiid) ovddas mun jearan dus, NN (oppa namma), dáhtutgo don váldit NN (oppa namma) náittosguoibminat ja čájehit sutnje oskkáldasvuoda ja ráhkisvuoda miehte- ja vuostegiedageavadiin?

Vástáduš:

De dáhtun.

Báhppá jearrá moarsis:

Buotdiehhti Ipmila muoduid ovddas ja dán searvegotti (dáid duodaš-teaddjiid) ovddas mun jearan dus, NN (oppa namma), dáhtutgo don váldit NN (oppa namma) náittosguoibminat ja čájehit sutnje oskkáldasvuoda ja ráhkisvuoda miehte- ja vuostegiedageavadiin?

Vástáduš:

De dáhtun.

## 9. Suorpmasrohkos

---

Irgi geige báhppii suorbmasa (irggiguovttos moarsiin geigeba báhppii suorbmasa).

Guoimmiguovttos sáhttiba luoitádit čippiid ala.

Báhppa bajida suorbmasa (suorbmasiid) ja cealká:

Rohkadallot dan lihtu ovddas, man mearkan dát suorpmas lea (dát suorbmaset leat).

Buotveagalaš Ipmil.

Don ieš leat ráhkisvuoha ja buressivdnidat sin, gudet dorvvastit dutnje.

Váldde suodjásat dán lihtu,

man mearkan dát suorpmas lea (dát suorbmaset leat).

Veahket NN ja NN (ovdanamat) eallit náittoslihtus du bassi dáhtu mielde,

bissut goabbat guoibmáseaskka oskkáldassan

ja bálvalit goabbat guoimmiska giitevaš mielain.

Dán mii rohkadallat Hearrámet Jesusa Kristusa dihtii.

**S** Ámen.

Báhppa geige suorbmasa irgái, guhte bidjá dan moarsi gurot gieđa orbbežii. Juos geavahuvvojit guokte suorbmasa, báhppa addá guoimmiguoktái suorbmasiid, ja soai bidjaba daid goabbat guoimmiska gurot gieđa orbbežii.

## 10. Suorpmaslohpádusat

---

Juos guoimmiguovttos sávva, doaimmahus sáhttá ovdal suorbmasa (suorbmasiid) bidjama orbbežii joatkašuvvat dainna lágiin, ahte irgi doallá moarsiin suorbmasa (suorbmasiid) ja cealká:

Mun, NN,

válddán du, NN,

dál náittosguoibminan

ja dáhtun ráhkistit du buorre ja bahás beivviid [eallima loahpa rádjái].

Mearkan das mun attán dutnje dán suorbmasa.

Moarsi cealká:

Mun, NN,

válddán du, NN,

dál náittosguoibminan

ja dáhtun ráhkistit du buorre ja bahás beivviid [eallima loahpa rádjái].

Mearkan das mun válddán dus (attán dutnje) dán suorbmasa.

### **DAHJE**

Irgi cealká:

Mun ráhkistan du, NN.

Háliidan juogadit duinna iluid ja morrašiid

ja leat dutnje oskkáldas, dassáži go jápmin munno earuha.

Moarsi cealká:

Mun ráhkistan du, NN.

Háliidan juogadit duinna iluid ja morrašiid

ja leat dutnje oskkáldas, dassáži go jápmin munno earuha.

## 11. Náittoslihtu nannen ja náittosguimmiid buressivdnideapme

---

### Náittoslihtu nannen

**B** Doai leahppi dál váldán goabbat guoimmáde náittosguoibmin ja dovddastan dan almmolaččat Ipmila muoduid ovddas ja dán searvegotti oaidnut. Vihahansuorpmas lea addojuvvon mearkan dudno náittoslihtus. Ipmila ja su searvegotti bálvleaddjin mun nannen dudno lihtu ja cealkkán dál dudno náittosguoibmin.

### Náittosguimmiid buressivdnideapme

Náittosbárra sáhhtá luoitádit čippiid ala.

**B** [Ipmil, almmálaš Áhčči,  
addos dudnuide ilus ja buressivdnádusas.  
Ipmila áidna Bárdni  
lehtkos buorrevuodastis dudnuin nu ilu go morraša beivviid.  
Ipmil, Bassi Vuoigŋa,  
orros dudnos ja golggahehtkos álelassii ráhkisvuodas dudno váibmui].  
Buessivdnidehtkos dudno buotveagalaš ja árbmugas Ipmil,  
Áhčči ja (+) Bárdni ja Bassi Vuoigŋa.

### DAHJE

**B** [Ipmila Vuoigŋa láidehehtkos dudno,  
Ipmila fápmu várjalehtkos dudno,  
Ipmila viisodat oahpahehtkos dudno,  
Ipmila giehta suodjalehtkos dudno,  
Ipmila geaidnu čájehehtkos, gosa johtit].  
Buessivdnidehtkos dudno buotveagalaš ja árbmugas Ipmil,  
Áhčči ja (+) Bárdni ja Bassi Vuoigŋa.

### DAHJE

**B** Hearrámet Jesusa Kristusa árbmu ja Ipmila ráhkisvuohta ja Bassi Vuoigŋa oasálašvuohta lehtkos dudnuin.

**S** Ámen.

## 12. Sálbma

---

Sálmma sajis sáhttá leat eará heivvolaš musihkka.

## 13. Oktasaš ovddasrohkos

---

Sáhttá geavahit maiddá moarsemeassu minstara rohkosiid (čuokkis 19). Ávvuveahka sáhttá ovttas ráhkadit ja ollášuhttit rohkosa.

**B/O** Rohkadallot.

1. Ipmil, ráhkis almmálaš Áhčči. Mii rohkadallat buressivdnádusa NN:i ja NN:i, gudet leaba náitalan du muoduid ovddas. Buressivdnit sudno ruovttu. Nanusmahte sudno gaskasaš ráhkisvuoda. Veahket sudno guoddit ovddasvástádusa ja atte sudnuide oskkáldasvuoda. Veahket sudno vuoitit geahččalusaid. Várjal sudno rupmaša ja sielu. Láide sudno oppa eallima áigge ja veahket sudno eallima váttis beivviid. Gievrut sudnos oskku ja doaivvu. Doalvvo sudno oktii agálaš ruktui, šearratvuhtii. Gula min rohkosa Hearrámet Jesusa namas.
2. Buotveagalaš Ipmil. Juos don it hukse viesu, de snihkkárat barget dušši barggu. Čana dáid náittosguimmiid goabbat guoibmáseaskka ráhkisvuodain ja basut sudno náittoslihtu du nama gudnin. Veahket sudno ráhkadit ruovttu, gos osku, doaivu ja ráhkisvuohta rádđejit. Atte sudnuide Bassi Vuoiŋnat, nu ahte soai du buressivdnádusain ealášeigga ráfis. Veahket sudno gilvalit oskkus ja doalvvo sudno oktii almmi ruktui. Gula min Jesusa Kristusa, min Hearrámet dihtii.
3. Buotveagalaš, árbmugas Ipmil, mii giitit du ráhkisvuoda attáldagas. Buressivdnit NN ja NN, gudet leaba náitalan du muoduid ovddas. Mii giitit du das, ahte soai ráhkisteaba, luohttiba ja dáhttuba atnit fuola goabbat guoimmisteaskka oppa eallima áigge. Movttiidahte sudno šaddat oktii ain čavgadabbot, amas mihkkige sudno earuhit. Veahket sudno buot eallima beivviid bisuhit ráhkisvuoda ja oskkáldasvuoda. Divtte sudno ahtanussat almmá buohcuvuoda ja bárttiid, almmá makkárga váraid, mat sáhtásedje vahágahttit sudno. Juos miinu geahččalusaid deaivida sudno, divtte dan lagadit sudno goabbat guimmii-

neaskka ja duinna. Dán mii rohkadallat Hearrámet Jesusa Kristusa bokte.

4. Bassi Ipmil, almmálaš Áhčči. Juo álggu rájis don leat buressivdnidan luondduriikkat valljugas skeaŋkkaiguin. Atte buressivdnádušat dál NN:i ja NN:i, nu ahte soai čatnasivččiiga goabbat guoibmáseaskka sudno gaskasaš ráhkisvuodas ja guoibmevuodas. Veahket sudno atnit náittoslihtuska bassin ja čatnasit das goabbat guoibmáseaskka. Mii rohkadallat dán Bártnát Jesusa Kristusa, Hearrámet dihtii, guhte eallá ja rádde duinna ja Bassi Vuoiŋŋain áli ja agálaččat.

5.

**B/O** Ipmil, almmálaš Áhčči. Don leat ásahan náittoslihtu. Don basuhat ruovttuideamet Vuoiŋŋainat. Mii rohkadallat du: čana dáid náittosguimmiid goabbat guoibmáseaskka ráhkisvuodain ja buressivdnit sudno náittoslihtu namat gudnin. Mii rohkadallat du.

Áhčči dahje eadni

Don addet midjiide oktii min mánáid. Mii giitit dan ilus, maid soai leaba buktán min eallimii. Buressivdnit sudno, go soai vuoddudeaba iežaska ruovttu ja bearraša. Várjal sudno buot bahás. Atte sudnuide soabalaš miela ja oahpat sudno átnut ja addit ándagassii. Mii rohkadallat du.

Giinu oappáin dahje vieljain

Odne mii giitit du mánnávuoda ruovttusteamet. Oro NN:in ja NN:in ja várjal sudno dan mátkkis, masa soai leaba dál ráhkkaneamen. Veahket min bissut lagažin guhtet guimmiineamet. Mii rohkadallat du.

Giinu risvánhemiin

Gásttas don lohpidit buressivdnádušat mu rismánnái. Buressivdnit ainge su ja sutnje ráhkis olbmo. Veahket sudno muitit, ahte gástta árbmui oažžu máhccat ain oddasis. Mii rohkadallat du.



Giinu ustibiin

Don leat jodihan NN ja NN oktii. Buressivdnit sudno ráhkisvuoda. Veahket sudno bissut ovttas eallima loahpa rádjai. Atte midjiide ilu min ustitvuodas maiddáí boahhte áigge. Mii rohkadallat du.

**B/O** Almmálaš Áhčči. Giitu, ahte don gulat min rohkosiid. Mii guoddit dán náittosbárri ja iežamet du háldui. Doalvvo min oktii almmi ruktui. Gula min Bártnát Jesusa Kristusa, min Hearrámet bokte.

**S** Ámen.

## 14. Áhččámet

---

Hearrá rohkos celkojuvvo ovttá jítne.

**S** Áhččámet, don guhte leat almmis.

Basuhuvvos du namma.

Bohtos du riika.

Šaddos du dáhttu,

mo almmis nu maiddáí eatnama alde.

Atte midjiide odne min beaivválaš láibbi.

Ja atte midjiide min suttuid ándagassii,

nugo miige ándagassii addit velggolaččaidasamet.

Alege doalvvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Ámen.

## IV Loahpaheapme

---

### 15. Buressivdnádus

---

Buressivdnádusa manŋá báhppa addá náittosbárrii Biibbala.

**B** Hearrá buressivdnidivččii din ja várjalivččii din.

Hearrá čuvgešii muođuidis didjiide

ja livččii didjiide árbmugas.

Hearrá jorgalivččii muođuidis din beallái

ja attášii didjiide ráfi.

Áhči ja + Bártni ja Bassi Vuoiŋŋa nammii.

**S** Ámen.

### 16. Vuolggaheapme

---

Ávžžuhus celkojuvvo aiddo ovdalaš vuolgima.

**B** Mannet ráfis ja bálvolehket Hearrá iluin.

### \*17. Loahpahanmusihkka

---

Loahpahanmusihkkan sáhtá leat sálbma ja/dahje čuojanasmusihkka. Sálmma dahje lávlaga sáhtá lávlut maiddá čuoggá 15 ovddabealde.